

清源黑氏子周餘出痘勻朗嫩紅其色宛如榴子
晃亮可愛不知者不目之爲順卽爲氣血兩虛四
自身熱退而煩躁不寧不知油光者氣浮遊之色
也嫩紅者血浮遊之色也此氣血壅淤而至於相
反者先嫩後必板板而不鬆則泡先淡紅而後乾
乾而不暈則隱不急破其淤七八日通身皆泡九
日後則外剝斃在十四五日幸得勻朗可斷四成
令一稠密則無成色矣急用大劑減生地加歸尾

自三朝日夜四劑破其血而氣亦通至六日上身
紅活而形板七日五劑而頭面鬆綻八日通身亦
鬆綻身却大熱去紫草青皮加生地石膏九朝光
壯如珠面漿老而熱不減至十一日熱和血收飲
食大進十二日回好此亦隱伏症也識之者寡矣
三成半至三成痘

至於四成以下出自脾肝之間則又險而帶逆矣諸
症皆類四成較四成而又惡如熱不一日而卽出先

見於身稀少而細三日身穉而面始見點緊細不鬆
間有鬆者而不甚起熱勢較前反重四日稠密不堪
僅不至蒙頭鎖唇抱鬢托腮耳有間蘗沙者有間疊
錢蟾窩者餘痘僅有可觀有通身細而勻色乾紅者
有通身紫焦而正面有充肥可觀者形色不一類此
可推此僅三成半得藥六七十劑尤必圖之於早六
日則不救矣再有焦紫不堪而粒猶粗疎者有稀稠
不均却乾紅貫頂而又板者有兩鬢多蘗沙僅不模

糊身稠而乾滯不鬆者此僅三成逆痘微有生機者
然必圖之於蚤治之得法藥必百劑死中求活始可
挽回

附一焦紫治驗

東郡徐浣老長公郎七歲痘出稠密焦紫不堪僅
不細碎四日出齊而熱不退至五日猶譫語不止
妄聞妄見惟口角旁有數粒雖紫而猶充肥根血
微有動意此生機也以大劑破血涼血清火加石

膏兩餘黃連三錢日夜五劑而熱始退去石膏黃連加紫草日夜六服胸起水泡以針盡挑之至七口面有漿色迴身猶紫復加石膏八朝面漿滿而身漿半總不能光澤明潤九朝糊塗成膿兩腿多水泡亦有紫泡俱挑去後俱成膿時值盛夏酷熱無倫置之堂中熱猶難當兩旁打扇而始安十朝後腐爛作臭以金蓋散收之約用一斗去大黃石膏減生地加金銀花貝母黃芩連翹羌活日三服

後復通身泛疤至二十餘日身漸和潤飲食大進而始弗藥共計七十餘劑改容殘相僅存皮骨六十日而始能坐八十日而始能立肌肉生長精神倍增此三成半痘之一驗也

附一紫焦兼蘆沙治驗

吾邑齊氏七十三歲生一子六歲出痘於甲戌乃翁已卽世矣其痘甚惡通身稠密顆粒不鬆又犯倒出四日方見點於面顆粒緊細及透出皆蘆沙

也幸其止出於正面而不模糊天庭及兩陽口邊
猶成顆粒其色深紅而老此生機也痘可三成半
予卽以大劑破血行氣透毒日夜四劑以家無正
主失於姑息進藥艱難誤及一日頭面皆板身更
焦紫幾不可救幸其兩頤根血隱隱有活動之色
猶可爲也僅可三成而已勢不可緩用大黃二兩
半生地二兩紫草青皮各五錢餘亦類加日夜五
服至六日面轉深紅下紫而且板腿更起泡盡行

挑去幸蘗沙亦成顆粒七日面有漿色胸背亦起
而猶板紫色漸轉有放白之意八日去紫草加石
膏日夜六服正面成漿身忽大熱以火透也用石
膏二兩生地三兩九日面成膿而身成漿腿雖有
漿而泡猶起餘者終板十日漿行周身但無潤澤
之意十一日板者皆膿且飽但盡灰色飲食始進
而未快身熱退而未和減大黃五錢凡膿過期而
始滿且灰色者後必外靨以熱蒸而不斂也十二

日漸漸腐爛身熱猶然至十五日身忽大熱大渴
不食而兼嗽以餘毒將發也仍用大劑加黃芩桔
梗金銀花羌活通身復泛外以化毒膏貼之十八
日忽大瀉作渴以火注於大腸也更加滑石澤瀉
外以石膏竹葉煎湯代水以濟其渴至二十日猶
不思食餘毒纏擾日久精神疲憊權用參歸化毒
湯加人參二錢連進二服精神復振熱勢猶然而
泄漸減仍用清解之劑至廿二日以後熱始和食

始進渴亦止瘡疤漸愈後以參歸與忍冬湯間服
廿五朝外熱和神爽飲食大進二便安然藥亦大
減至一月而始弗藥用藥一百餘劑以後飲食倍
加精神健旺肌肉生長以見有病病受如此

附一乾紅板實治驗

予孫四歲時痘忽然大熱身卽見點緊細不鬆卽
以大劑透毒清火日三服次日面猶不見先出者
乾紅其色熱漸加而乾嘔予知其伏毒之盛也加

黃連石膏三日面始見點緊細不鬆煩躁不寧其
天庭旁一塊乾紅因前跌傷舊疤而見四日出齊
而熱退身不甚稠乾紅而板面雖稠而不模糊其
乾紅一塊平起不分點粒預以化毒膏貼而勤換
之成色之下卽在此痘僅三成耳用大劑減生地
去石膏黃連加歸尾紫草青皮更以穿甲一錢以
透其潛伏日夜五服至五朝血不動加六服六朝
而血始透猶不鬆七朝面有漿色而仍板身血微

動而終乾加七服至八朝身始熱痘始鬆乾色雖
退而根血不得紅以毒潛伏血猶未得通融也九
朝正面成膿天庭猶板以毒根尚未拔也身雖有
漿意終板而不紅十朝身大熱而根血始紅去紫
草歸尾穿甲加生地石膏十一朝板者忽鬆而成
膿且飽但灰色而不光潤痘凡後起而色灰後必
不結靨天庭一塊白爛如糊仍貼之食稍進一二
朝面雖靨而血未盡通身腐爛將來餘毒在所不

免加羌活以活之十三朝忽不食煩熱甚眼忽封
聲又啞此餘毒太盛而難洩也加黃芩甘草菊花
一夜服七劑十四朝外種種餘毒相繼而起眼復
開而生翳加木賊穀精身熱始退退而又起起而
又退飲食稍進藥亦漸減至廿朝外天庭始愈目
翳亦退牙疳亦消身瘡漸平遂弗藥但愁容可掬
骨瘦如柴至月餘自首而下始有汗而潤漸及周
身飲食大進二便調和肌生而神旺矣未痘前面

色暗白而黃至此更紅潤可觀是氣血至此乃得正也此痘共用藥一百一十餘劑又治之於始而後得生甚矣三成痘之難也

三成以下不可言矣凡密如蠶子與肉色無別鎖口鎖唇唇裂流血滿口如霜此脾經之症也再下而腰如被杖有點無粒形如灑墨此腎經之症也皆不可救今將不治之症開列於後

細密如蠶殼者不治

平板如蛇皮者不治

一出有黑點者不治

一出紫點無粒不成顆者不治

倒出面無一點三日始及頷下而細密者四日面

必細密無縫者不治

一熱卽腰痛先見點於腰紫白相間者不治

四日通身稠密無縫而灰色者不治

蒙頭覆釜者不治

鎖口鎖唇不分珠者不治

兩鬢細碎不分顆者不治

托腮鎖項餘痘灰暗者不治

通身蘊沙者不治

痘稠而間青紫點者不治

油光細密者不治

身多攢簇餘痘慘淡板實者不治

頂薄根板通身淡乾紅者不治